



Meyate Beeqqo

Leveled



Kuni irkisaanchu maxaafi 'USAID'inni afi'nonni woxu irkonni 'Save the Children'i, Rosu Ministerenna Wodiidi Daga Dagoominna Manni Qoqqowu Mangiste Rosu Biiro mittimmate sumiimmenni qixxaawe attamamino.

2009 M.D



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>



Meyate Beeqqo

Kifile 4

Lamala II





Gafa Mite

Koo-teemma

Koo-teemma yaa dagoomu giddo labbaahanna meyata la’anno loosu qeechi, kalaqamu mannimmate uurrinshanna surrete bowirre badooshshe la’anno hajo yaate. Addi addi dagoomi giddo Sidaamu mitto ikkana, aye dagoomi giddono kalaqamu badooshshe kaima assi’ne labbaahuranna meyatera rosichunni qeechinoonni loosi addi addihu no. konni kaiminni,

labbaahu wolqatenni, worbimmatenni, hayyotenninna noosi dandoonni baalantenni meyatenni rooranno gede assine la'nanniri hundinni kae nooreeti.

Togo yaano, labbaahunna meyati kalaqamunni noonsa badooshshi garinni lawishshaho meyati iltanno, qansidhanno; labbaahu kayinni hatto assa didandaanno. Wole widoonni kayinni, labbaahu dhuka meyatenni rooranno; korkaatuno, labbaahu baatto loosanno, haqqe karanno, wolereno ayirrinore assanno wolqa noosihuraati yinanni. Konnira, wolqa xa'manno loosira meyata didandiitanno yine hendanni daafiranna beeqqisiinsannikkihura badooshshu gede assine la'nanni yaate.

Worbimma lainohunnino, labbaahu gaado gaade ola olame diina qase woy ugaaxe fule moyicho shee daate bareende noosiha ikkino daafira worbu gede kiiramanno. Meyati kayinni, togoore assate jawaantenna bareende diafidhino yine ammannannihura gaadohono ikko ugaaxete beeqqisiinseenna worbimma leellishshe egentino

yanna lowota dianfanni. Konnira, kuni labbaahunna
meyate mereero badooshe ikke dagoomu giddo
egennammoreeti yaate.

Qoleno, labbaahu mittore kalaqatenna hayyo
horoonsi're tuncu yinosire muddamikkinni gare
roorreenya adhate wodaanni assanno dandoo
heedhannasi, meyati kayinni muddantannohura
hayyotenni fulte diaffanno yinanni. Konni raginnino,
meyatera kaayyo uyine dandoosenna hayyichimmase
keenne egenninoonni yanna kayinni dino.

Konne la'nanni woyite, koo-teemma dagoomu
rosichunni labbaahuranna meyatera babbade
babbaxxino qeecha kalaqinohura labbaahu rooriidi
darga meyati woriidi deerra afidhe egennantino
hajooti yaate. Ila woy qansi'ra dandaanna hooga
kalaqamunni meyatenna labbaahu badooshe ikka
adda ikkirono wolqa, worbimmanna hayyichimma
lamunku badooshe ikkara didandaannoreeti.
Konne mitte hige ammane adha qarrissannota
ikkiturono,hee'noommo yannara rosu egenno

xawissino caabbichi koo-teemmate taalleenya leellishanni dayino.

Konnira, labbaahu assannore meyatino assitara meyati assitannoreno labbaahu assara dandaannota loosunni leellishate meyati babbaxxino dagoomu assootira beeqqaancho assate kaayyo kalaqa hasiissanno. Lawishshaho, meyata beeqqisiisa dandiinannihu woy meyate beeqqo ajje leeltanno qarqari rosu, fayyimmatenna giwirinnu qara qarareeti. Konne qarqara xaa geeshsha taje leellishshanno garinni, meentuu beeqqo lowo geeshsha ajje leeltannote.

Meyati labbaahunni jawaantetenni, dandootenni, egennotenninna fullanketenni ajjinota woy labbaahura woroonni noo gede assine la'nanniri yanna yannantenni ajjanni dayirono, hasi'noonni deerra iillara didandiino. Lawishshaho, umi dirimi rosinni kayise luphiimu deerri yuniverstete deerri geeshsha meyate beeqqo ajjinota buuxi'ra dandiinanni.

Fayyimmatenna giwirinnu ragaannino ikkiro
hattoontilla. Ogimma labbaa beettita calla assine
la'nanni la'ooshshi yanna yannatenni soorramanni
dayirono, wo'munni wo'ma loosu aana hose
hagiirsiisanno garinni dileellino. Kuni kayinni,
woyyanninna wo'munni wo'ma soorramanni ha'rara
dandaannohu meya labbaahu leelleennasi taalo
sharro assiro calla ikkinota baalunku wodancha
dandiineemmo. Togo assate, balanxe afa
hasiissannonkeri dagoomunniti albiiditinna xaa lao
hiittootero, meentu beeqqo ganyite hasiissannohu
hiikkootironna beeqqo ledate assa hasiissannore
seekke hegersa hasiissanno.



Gafa Lame

Dagoomu Lao

Dagoomu laore kayinsanni woyite, balanxe dagoomu yaanna lao yaa mayyaatero boodere huwato kalaqi'ra hasiissanno. Dagoomu yineemmohu barru hoshshonni, hagiirru dadillunni, budunni, afuunni, woleno konne lawannorinni xaande hee'neemmo qachinke woy olliinke mannaati yaate. Kuni olliinke

manni mitteenni hee'ranno woyite dagoomitte galte
subbe heedhanno gede hedonna lao soorri're galanno.
Lao yaano, adhinannire mittenni adhine gimbannireno
mitteenni gimbe hasiissanno yannaranna xaadanno
tunceenyira loosu aana hosiise leellate yaate.

Konni daafira, dagoomu mitteenni heedhannonna
mittu budinni galtanno dagaati yaate dandiineemo.
Mitte daga laono sumuu yite mittimmatenni assitanno
assooti gumaati yinammora dandiineemmo.


Dagoomunniti bi're hundi heeshshonna xaati maatiro
la"ate wo'naala yaa, albi manninna xa manni
meyatenna labbaahu mereero noo badooshshe hiitto
asse la"annoro hegersate yaate.

Yanna, dirranna wogga soorrantanni hadhu bikkinni
manchi beettiti tiuu ra'nenna surrete bowirre
lexxitanni hadhanno. Tiiu ra'nenna bowirre lexxitu
bikkinni qole manchu egennotenni kaajjanni fafise
hedanno wolqa afi'ranno.

Konnira, alba adda asse lae assannorena
mararroweelo miicannore agure shaqqillunni lae
assannorinna yaannori darga amadanni ha'ranno
woyite laote soorro kalaqantu yaate. Albinni sao
xaa yannara mannu kalaqama baala loosate, assate,
hedate, jawaatate, daafurate, goxate, ka"ate,
hagiidhate, dadillate, w.k.l mitto maala adhite
kalaqantinota dagoomu giddo wodanchinanni
hee'noonni.

Albi manni hedannohu meyati labbaahunni ajjinotanna
woffi yitinota asseeti. Konnira, babbaxxitino hajonni
labbaahunni taashshe la"ate didandaanno. Meyati
mini hajo calla wonshitara aguratenni labbaahu
hosannowa hoossara, labbaahu loosannore loossara,
w.k.l la'ara kaayyo diaannose. Mitteenni noowa nafa
qote xaade hasaawaho beeqqe hedo shiqishanna
mala abba didandaanno. Qaaqqulle lossate ragaanni
nafa lowo duhano duqqitannoti meyatella ikkinnina
labbaahu gobbayidi hajo gudate gobbaanni kaa'lame
xure hayishsha woy shuma feya fokkote.

Xaa yannara kayinni, meyati labbaahura woriidita
ikkitinokki gede leellishshannoti addi addi kaayyo
kalaqantanna alba no yini badooshshi gatanni daanni
no. Konnira, meyati coyidhe tidha dandiitannotanna
hayyo kalaqate ajjinokkita ammanne adhinanni
geeshsha iillinanni hee'noonni. Meyati rossuronna
ogimma afidhuro miniseranna dagoomaho lowo horo
afidhinota duuchu manni hegersanni leellanno. Tini
dagoominke giddo afantanno hundi laootinna xaa
yannara la'nanni hee'noommo hunditenni baxxitino
laooti.



Gafa Sase

Beeqqo Hasiissannowa

Meyate beeqqo ajje leltanno qarqarubba bade afa hasiissannote. Kalaqamunni dagoomu lao garinni labbaahu lowiidi dargiha ikkeenna meyati kayinni hooffayidi dargita ikkite leltannohu hasiisannokki badooshshe kalaqino coyeti yaate.

Kuni badooshshi ajeenna seennu woy meentu
taalleenya afi're beeqqonsa ganye leellishate rosu,
fayyimmanna giwirinnu tenne borrora qara illachaati.

Rosu mine meyate beeqqo yanna yannatenni
lexxitanni daggurono, addi addi raginni lamunku
mereero kalaqamanno badooshshi bashshoo lao
garinni ikkannori duuchuri no. Lawishshaho,
rosiisaano kifilete giddo rosiissannonna lawishsha
uyitanno yannara horoonsidhanno qaalla labbaahu
widira calla dassitinota ikka mitto coyeti. Maxaaffate
giddo ikkirono, labbaaha kaajjado assine meyata
kayinni wolqaweelonna jawaante afidhinokki gede
assine lawishsha wora woy dhagge borreessa meyate
beeqqooshe ajishshanno. Dagoomu giddo ikkirono,
“Meyati rosse hiikka iillitanno?” yinanni yaatto
meyata wolqa huntannote. Togoondi assinannirichi,
albaage sufiro meyatenna labbaahu mereero
hasiisannokki badooshshe halashshanni haa're
ha'rannonno yaate.

Uminna layinki dirimi rosi minna giddo meyate beeqqo dancha ikkiturono, kolleejjetenna yuniverstete deerrinni lowo geeshsha ajjino beeqqo noota afa dandiinanniti baca taje no. Jawaate yuniverste sai seennino yuniverstete kaajjado rosu gollara lawishshaho, fiiziksete, shallagote, injineringete, woleno togoore labbanno bare eate ruxxi yaanni beeqqo assikkinni gatanna Sidaami seenne duucha dianfanni. Kuni leellishannohu rosu barera meyate beeqqo woffi yitinota ikkaseeti

Fayyimmate bare mannunnita ikko saadate keeraanchimma dhibbunni gargarate woy fayyimma hunanno dhiwana xagisate ogimma rosunni qajeelle afi'nannite. Afi'nanni ogimma shotu deerrinni ka'e luphiimu deerri geeshsha noota ikkite, nersenna dottora ikkate geeshsha noo ogimmaati yaate.


Konni ragaannino ikkiro, meyate beeqqo lowo geeshsha dihagiirsiissinote yinanni woyite addi addi korkaati hee'rara dandaanno. Lawishshaho, meya beetto babbaxxino mini loosi hajonni

usurantanno daafira hasiisaanno deerrinni umose qixxeessite wo’mu wodaninni xiinxaabbe egenno cu’mi’rate dandaa hooga mitto coyeti. Kuni roorinni meyati xawo fulte wolaphinatunni togoo assootira beeqqitannokki gede dagoomu kalaqino kado rumuxxite hee’rasenniiti. Yanna yannatenni tini kado woyyaabbanni daggurono, xaa geeshsha Sidaamaha meyati konni raginni hala’lado darga amadde dileeltanno. Hanni qarqarinkera afantanno fayyimmate agarooshshi uurrinshuwara woy akimmate minnara mageeshshi meyati hattenne uurrinsha massagatenni ikko nerse woy dottora ikkite loossannoti me”etero buuxate wo’naallo.

Sayikki deerrira la’neemmohu meyate beeqqo hasiissanno qarqari giwirinna ikkana, giwirinnu baattote aana loonsanni irshu loosi gumaati. Giwirinna latinsanniti albitinna xaa doogga badooshshe afidhinote. Albiti qotto, wenencho, godeessa, handanna w.k.l horoonsi’ne loonsannita ikkittanna, xaati yannite abbitino udiinnicho lawishshaho tiraakterete gedeere horoonsi’ne

irsha loonsannite. Albi doogonnino ikko yannite doogonni loonsanniri lowo gede latara egennonnita ogimmaancho irko assate konni deerri ogimma hasiissanno. Lawishshaho, giwirinnu ogeeyyeeti yineenna ollu olluunkunni mangistetenni gaamante loosi'nanni garire, horoonsi'nanni gidireenna maddaabbarire egenno beehate looso loossanno.

Xaa yanna meyate beeqqo giwirinnu raginni leddanni dagginota ikkiturono, hasi'noonni deerri gumi leellino yaate didandiinanni. Konni daafira, tenne giwirinnu ogimma addi addi golira qajeelte ogeeyye ikkitinori meya ogeeyye duucha dianfanni. Giwirinnu latishshira kiiramannohu lalu woy saadate fayyimma agarooshshino. Konni ragaannino ikkiro saadate dottora ikkite tenne ogimma qajeeltinoti meya beetto haammatte diafantanno. Konnira babbaxxino korkaati hee'rirono, meyati yannitte ogimmani qajeelte ogeette ikkitankunni mini giddoyidi ogimmani busulte minese seekkite amaddara calla hasi'nanni lao dagoomu giddo filiqqisantannohuraati.




Gafa Shoole

Beeqo Ledate Assa Hasiissannore

Meyati rosoho, fayyimmatenna giwirinnu ogimmara ikkado beeqo assitanno gede addi addi qaafu adhanna ganyine lao woyyaabbanno gede lowo loosa loosa hasiissanno. Lao mitte higge mittu barrinni soorantannota ikkitinokki daafira uurrinshiweelo sharro assanna dagooma rosiisa hasiissanno. Dagooma qaalunni calla rosiisa ikkikkinni

babbaxxitino qaafu adhinanni annu annunku
rosiisannore loosunni leellisha qaranna balaxaancho
hajo ikka noose yaate. Konne assiniro umise yannanni
meyate beeqqo lexxitanni ha'rase digattanno.

Rosiisaanono ikkituro, meyatanna labbaaha
taalo jawaachishanno garinni roso sayisa
hasiissannonsa. Lawishshaho, hajajo woy biddissa
sayisate horoonsidhanno qaalla, xa'mo xa'minanni
yannara, lawishsha kulate hasi'nanni yannara,
labbaaha calla illachinshe assinanni assoote agura
hasiissanno. Rosu mini gashshooti, sooreeyye, ila
ayiddinna olluu riqiwaano ikkite rosu mini hajo
massaggannorino seenu beeqqo rosu mine lexxitanni
hadhara dagoomaho hegerre kalaqanno assootenna
seenneho kakkaoooshshe ikkannore ganyite loosa
hasiissannonsa.



Gafa Onte

Meyate Beeqo Xaphoomunni

Meyati rosoho, fayyimmatenna giwirinnu ogimmani wo'ma woy xibbe anga beeqo assituro mayi xe'nose? Labbaahu lame anga onte qubbe afi'nonte gede meyatino hatto ikkinnina labbaahunni mitto biso xe'e dikalaqantino. Meentu beeqo dagoomu heeshso soorritannote; kalqoomu mittimma kalaqqannotenna fullankete deerra luphiima assitannote.

